

## Ukuu wa Utukufu wa Milele

*Tusiviangalie vinavyoonekana, bali visivyoonekana. Kwa maana vinavyoonekana ni vya muda tu; bali visivyoonekana ni vya milele.—2 Wakorintho 4:18.*

**M**iaka ya kujikana nafsi, ya kujinyima, ya majaribu, huzuni na mateso ambayo Paulo aliistahimili, aliitaja kuwa kitambo. Mambo ya wakati uliopo hayakuchukuliwa kufaa kuyataja yanapolinganishwa na wingi wa utukufu wa milele ambao unawangoja wakati pambano litakapokuwa limekwisha. Mateso haya yalikuwa vitendea kazi vya Mungu, vilivyowekwa wakfu kwa ajili ya ustawishaji wa tabia ya Kikristo. Vyovyote vile hali ya mambo ya Mkristo itakavyokuwa, vyovyote vile inavyoweza kuwa giza ama fumbo la uwekevu wa Mungu, hata iwe kukosa na kuteseka kwake, anaweza kutazama mbali na hayo yote na kutazama yasiyoonekana na ya milele. Anao uthibitisho wa Baraka kwamba mambo yote yanatendeka kwa ajili ya faida yake....

Roho Mtakatifu aliingazia nafsi ya Paulo kwa nuru itokayo mbinguni na alihakikishiwa kwamba alikuwa na faida katika mali iliyonunuliwa na kuhifadhiwa kwa ajili ya waaminifu. Lugha ya Paulo ilikuwa thabiti. Hakuweza kupata maneno yenye nguvu ifaayo ili kuelezea uzuri wa ule utukufu, heshima na kutokufa ambako waumini wataupokea pale Yesu atakapokuja. Ikilinganishwa na tukio ambalo jicho la aiki yake lilikuwa likitazama, mateso yote ya muda yalikuwa ya kitambo tu, mateso mepesi, yasiyofaa kufikiwa. Yakiangaliwa kwa nuru ya msalaba, mambo ya maisha haya yalikuwa ni ubatili na kujilisha upepo. Utukufu ule uliomvutia ulikuwa thabiti, mwingi, wa kudumu, zaidi ya uwezo wa lugha kuweza kuelezea.

Japokuwa Paulo anajaribu kuuelezea kadiri awezavyo, ili kwamba fikra iweze kuelewa uhalisia kadiri inavyowezezana kwa watu wenye kikomo. Ulikuwa ni wingi wa utukufu, ukamilifu wa Mungu, maarifa ambayo hayakuweza kupimika. Ulikuwa ni utukufu mwingi mno wa milele. Inashindikana kuelezea uhalisia wake. Anatafuta kupata maneno yatakayoeleweka zaidi. Tamathali ya usemi iliyo thabiti kabisa haitaweza kuuelezea ukweli. Anatafuta maneno yaliyo bora zaidi ambayo lugha ya kibinadamu inaweza kutoa, ili kwamba fikra iweze kung'amua kwa kiasi fulani ubora wa hali ya juu ya utukufu atakaopewa mshindi wa mwisho.

Utakatifu, hadhi, heshima na furaha kuu katika uwepo wa Mungu ni vitu ambavyo havionekani kwa sasa isipokuwa kwa jicho la imani. Lakini vitu vinavyoonekana, yaani heshima ya dunia, anasa za dunia, utajiri na utukufu, vimepitwa kwa mbali sana kwa ubora, uzuri na mng'ao wa utukufu wa mambo yasiyoonekana sasa. Mambo ya dunia hii ni ya kitambo, yakidumu tu kwa muda mchache, wakati mambo yasiyoonekana ni ya milele, yakidumu vizazi hata vizazi pasi na mwisho. Kujipatia hazina hii ya milele ni kupata kila kitu bila kupoteza chochote (*The S.D.A. Bible Commentary, Ellen G. White Comments, vol. 6, 1099, 1100*).

Katika siku zijazo tutaona jinsi majaribu yetu yote yalivyonganishwa kwa ukaribu na wokovu wetu, na jinsi mateso haya mepesi yalivyofanya kazi kwa faida yetu “yakitufanyia utukufu wa milele uzidio kuwa mwingi sana”

(2 Wakorintho 4:17) (Letter 5, 1880).